



# Skútustaðahreppur

10. júní 2020 – Pistill nr. 76

## Pistill sveitarstjóra

Þorsteinn Gunnarsson



Margrét Halla Lúðvíksdóttir skrifstofustjóri með Jafnlaunavottunina.

### Skútustaðahreppur hlýtur Jafnlaunavottun


Skútustaðahreppur hefur hlotið jafnlaunavottun frá frá vottunarstofunni iCert, sem er staðfesting þess að jafnlaunakerfi Skútustaðahrepps samræmist kröfum jafnlaunastaðalsins, ÍST85:2012.

Jafnréttisstofa hefur jafnframt staðfest vottunina. Tilgangur jafnlaunavottunar er að vinna gegn kynbundnum launamun og miða að auknu launajafnrétti kynjanna. Með þessu er markmiðið að auka almenna starfsánægju starfsmanna með gegnsærra og réttlátara launakerfi.

Jafnlaunastefna Skútustaðahrepps snýst um að greidd séu sömu laun fyrir jafn verðmæt störf óháð kyni þess sem sinnir starfinu. Jafnlaunastefnan er hluti af Mannauðsstefnu Skútustaðahrepps. Skútustaðahreppur hefur undanfarið verið í innleiðingu á jafnlaunakerfi með það að markmiði að hljóta jafnlaunavottun. Jafnlaunakerfið er sett upp samkvæmt jafnréttislögum og jafnlaunastaðli. Sú vinna hefur gengið vel og er jafnlaunakerfið nú tilbúið og búið að taka í notkun. Vottunarúttekt fór

fram og er niðurstaðan sú að Skútustaðahreppur uppfyllir öll skilyrði sem sett eru fram til að hljóta jafnlaunavottun.

Meðal jafnlaunamarkmiða sveitarfélagsins er að útrýma óútskýrðum launamun umfram 2%. Niðurstaða launagreiningar sýnir kynbundinn launamun, þar sem konur mælast með 2,83% hærri laun en karlar, þegar litið er til uppreiknaðra heildarlauna. Úr launagreiningunni komu nokkur frávik sem öll hafa verið sett í farveg og vinnslu í samræmi við verklagsreglu um frábrigði, úrbætur og forvarnir. Lögð var áherslu á það í upphafi að starfsfólk á hreppsskrifu myndi sjá um innleiðinguna svo þekkingin á jafnlaunakerfinu myndi haldast þar. Margrét Halla Lúðvíksdóttir skrifstofustjóri hélt utan um verkefnið með glæsibrag. Sveitarstjórn lýsti yfir ánægju sinni með jafnlaunavottunina.



JAFNLAUNAVOTTUN  
2020 - 2023



Helgi Héðinsson oddviti og Sveinn Margeirsson nýráðinn sveitarstjóri við undirritun ráðningasamningsins.

### **Sveinn Margeirsson ráðinn nýr sveitarstjóri**

Sveitarstjórn samþykkir að ráða Svein Margeirsson í starf sveitarstjóra Skútustaðahrepps til loka yfirstandandi kjörtímabils en hann tekur við af Þorsteini Gunnarssyni sem hefur verið ráðinn borgarritari.

Sveinn Margeirsson er með doktorspróf í iðnaðarverkfræði og hefur lokið General Management Program frá Harvard Business School. Sveinn hefur starfað sem sjálfstæður ráðgjafi á sviði nýsköpunar og stefnumótunar fyrir sveitarfélög, stofnanir, fyrirtæki og félagasamtök síðan 2019. Þar á undan gegndi hann starfi forstjóra, sviðsstjóra og deildarstjóra hjá Mátis í 11 ár. Sveinn hefur yfirgripsmikla þekkingu og reynslu af nýsköpun, stefnumótun, stjórnun og rekstri. Hann hefur jafnframt mikla reynslu af stjórnarsýslu sem forstjóri hjá opinberu hlutafélagi og ráðgjafi við sveitarfélög og stofnanir. Auk þessa hefur Sveinn komið að umhverfis- og skipulagsmálum t.d. við gerð aðalskipulags og hefur viðamikla reynslu af miðlun efnis í ræðu og riti á fjölda miðla. Capacent var sveitarstjórn innan handar í ráðningaferlinu. Alls sótti 21 um starf sveitarstjóra Skútustaðahrepps en tveir dróu umsóknina til baka.

Umsækjendur voru:

Ásbjörn Ólafur Ásbjörnsson  
Berglind Ragnarsdóttir  
Bjarni Jónsson  
Björgvin Harri Bjarnason  
Einar Örn Thorlacius  
Glúmur Baldvinsson

Grétar Ásgeirsson  
Gunnar Örn Arnarson  
Gunnlaugur A. Júlíusson  
Jón Hrói Finnsson  
Jónína Benediktsdóttir  
Ólafur Kjartansson  
Páll Línberg Sigurðsson  
Rögnvaldur Guðmundsson  
Sigurður Jónsson  
Siguróli Magni Sigurðsson  
Skúli H. M. Thoroddsen  
Sólborg Lilja Steinþórsdóttir  
Sveinn Margeirsson

Sveinn hefur störf 1. ágúst og býður sveitarstjórn hann velkominn starfa.



### **Ungmennaráð fundaði með sveitarstjórn**

Ungmennaráð Skútustaðahrepps mætti á fyrsta sinn á fund sveitarstjórnar Skútustaðahrepps. Fyrir hönd ungmennaráðs mættu Helgi James Price Þórarinnsson, Inga Þórarinsdóttir og Arna Þóra Ottósdóttir. Í ungmennaráðinu eru jafnframt Dóróthea Gerður Örnólfsdóttir og Anna Mary Yngvadóttir. Fyrsti fundur ungmennaráðs var haldinn 16. janúar s.l. en ráðið hefur alls haldið fimm fundi.

Helgi, Inga og Arna fóru yfir helstu áherslur ungmennaráðsins sem eru m.a. umferðaröryggismál, aðkoma að skóla og íþróttahúsi, lagfæring á leiktækjum í skólanum,

leiðbeina ungu fólki í líkamsræktinni, starfsemi félagsmiðstöðvar, hinsegin fræðsla fyrir almenning, regnbogagangstétt, samráðsvettvangur ungmennaráða á svæði SSNE, hundasvæði, sundlaugarmál o.fl.

Sveitarstjórn þakkar ungmennaráði fyrir góðar hugmyndir og gott samtal um málefni ungs fólks. Hugmyndunum verður vísað í viðeigandi nefndir, í framkvæmd það sem hægt er og til gerðar fjárhagsáætlunar.

Sveitarstjórn lýsir yfir mikilli ánægju með að starfsemi ungmennaráðs er komin af stað.

Mikilvægt er fyrir sveitarfélagið að hlusta á sjónarmið unga fólks og bjóða þeim meiri aðkomu að málefnum sveitarfélagsins.



*Ingi Þór Yngvason minka og refaskytta lét af störfum hjá sveitarfélagi um síðustu mánaðarmót eftir 44 ára starf. Sveitarstjórn þakkaði honum fyrir framúrskarandi starf við verndum lífríkisins í Mývatnssveit á sveitarstjórnarfundum í morgun þar sem hann var leystur út með blómum og gjöfum. Daði Lange Friðriksson hefur verið ráðinn grenjaskytta í hans stað.*

### **Sögulegir samningar við landeigendur**

Segja má að sveitarstjórnarfundurinn í morgun hafi verið sögulegur að mörgu leyti því þá samþykkti sveitarstjórn fyrir sitt leyti samning við Landeigendafélagið í Vogum um nýjan hitaveitusamning. Um var að ræða viðauka við nýja samning sem samþykktur var í mars en í viðaukasamningnum voru gerð nokkur sérákvæði. Þar með lýkur áratuga deilum um hitaveitumálin eða frá því landeigendur í Vogum sögðu upp árið 1991 gamla hitaveitusamningnum frá 1971.

Í febrúar s.l. var einnig gerður samningur við Landeigendafélag Reykjahlíðar um viðauka við samninginn frá 1971 og þar með lauk einnig áralöngum deilum um hitaveitumálin.

Er sérstakt fagnaðarefni að ljúka við gerð beggja þessara samninga og sátt og friður náist um starfsemi hitaveitunnar til framtíðar.



*Orkusalan kom ferandi hendi á hreppsskrifstofuna á dögnum. Mývettingurinn Heiða Halldórsdóttir sem er markaðsstjóri Orkusölnnar færði sveitarfélaginu trjáplöntur sem Vinnuskólinn mun gróðursetja. Kærar þakkir Orkusalan. Á myndinni er Alma Dröfn Benediktsdóttir skrifstofufulltrúi með trjáplönturnar góðu.*

### **Reykjahlíðarskóla slitið**

Reykjahlíðarskóla var slitið á dögnum. Skólaslit voru með nokkuð öðrum hætti en venjulega fjölda fjöldatakmarkana. En nemendur í 10. Bekk voru útskrifaðir með viðhöfum að viðstöddu starfsfólki grunnskólans og foreldraum. Skólastarfið í vetur gekk vel. Búið er að ráða í allar stöður fyrir næsta vetur. Talsverðar breytingar verða á skólastarfi næsta vetur en þá verður kennslufyrirkomulagi breytt á þann veg að samþætting verður á milli kennslugreina. Hjördís Albertsdóttir verður verkefnisstjóri samþættingarinnar.

Pá hefur Stefán Jakobsson verið ráðinn til að sjá um tónlistarkennslu í skólanum næsta vetur.



Starfsfólk Reykjahlíðarskóla.



Nemendurnir sem útskrifuðust úr 10. bekk; Anna Mary, Arna Þóra, Kristján Snær og Ólöf Kristín.



Starfsstöð Vatnajökulspjöldgarðs í Mikley fékk á dögnum viðurkenningu fyrir skref 2 í "Grænum skrefum". Það felur í sér vistvænar áherslur í rekstri húsnæðis Skútustaðahrepps á Hlíðarvegi og á t.d. við um sorpflokkun, hreinlætisvörur og upplýsingar til starfsmanna um umhverfismál. Jóhanna Katrín starfsmaður Vatnajökulspjöldgarðs og Þorsteinn með viðurkenninguna.

## Samgöngu- og sveitarstjórnarráðherra í heimsókn

Sigurður Ingi Jóhannsson samgöngu- og sveitarstjórnarráðherra fundaði með sveitarstjóra, oddvita og varaoddvita í vikunni til þess að fara yfir stöðuna í Skútustaðahreppi sem er eitt þeirra 9 sveitarfélaga sem er hvað háðast ferðapjónustunni og fer hvað verst út úr samdrættinum í kjölfar Covid-19. Var fundurinn ánægjulegur og gagnlegur og mikilvægt að fá ráðherra í heimsókn til að fara yfir stöðuna. Jafnframt fór Sigurður Ingi í heimsókn í nokkur fyrirtæki í sveitinni.



Frá heimsókn ráðherra. F.v. Sigurður varaoddviti, Margrét Halla skrifstofustjóri, Alma skrifstofufulltrúi, Helgi oddviti, Sigurður Ingi sveitarstjórnarráðherra og Hermann skrifstofustjóri ráðuneytisins.

## Lokaskýrsla sundlaugarnefndar lögð fram

Sveitarstjórn samþykkti á fundi sínum 10. apríl 2019 að skipa nefnd vegna endurbyggingar sundlaugar í Skútustaðahreppi. Nefndina skipuðu:

- Sveitarstjórn: Helgi Héðinsson formaður og Halldór Þ. Sigurðsson.
- Atvinnumála- og framkvæmdanefnd: Edda Hrund Guðmundsdóttir.
- Mývetningur, íþrótt- ungmennafélag: Jóhanna Jóhannesdóttir.
- Fulltrúar íbúa og atvinnulífs: Pétur Snæbjörnsson og Ólafur Ragnarsson.
- Fulltrúi eldri Mývetninga: Birkir Fanndal.
- Starfsmaður nefndarinnar: Þorsteinn Gunnarsson, sveitarstjóri.

Lögð fram lokaskýrsla nefndarinnar í samræmi við erindisbréf hennar.

#### Tillaga sundlaugarnefndar til sveitarstjórnar:

Sundlaugarnefndin hélt 9 bókaða fundi. Nefndin varð sammála í upphafi um að leggja áherslu á tvær sviðsmyndir við byggingu sundlaugar í Skútustaðahreppi. Annars vegar sviðsmynd 1 þar sem dregin er upp mynd af hagkvæmasta kostinum með 25 metra steypri laug eða úr stáli ásamt hreinsibúnaði sem uppfyllir ítrustu kröfur um hreinsun og miðað við staðsetningu þar sem eldra sundlaugarkar var. Hins vegar sviðsmynd 2 þar sem er að finna hönnun að draumalauginni til að draga að ferðamenn með framúrskarandi arkitektúr þar sem tekið er mið af náttúrufegurðinni í Mývatnssveit.

Faglausn dró upp sviðsmynd 1 með steypu sundlaugarkari en VA arkitektar sviðsmynd 2. Þá var leitað til A. Óskarssonar vegna sviðsmyndar 1 með sundlaugakar úr stáli. Jafnframt komu í ljós gögn frá 2013 frá Form ráðgjöf með teikningum af sundlaugarsvæði sem samsvarar til sviðsmyndar 1.

#### Rekstur sundlaugar:

Leitað var eftir upplýsingum um rekstur annarra sundlauga á landinu og fengust upplýsingar frá um 10 sveitarfélögum. Rekstur sundlauganna átti það sameiginlegt að standa ekki undir sér. Meira að segja vinsælar laugar eins og á Hófsósi og Blönduósi eru reknar með tapi á ársgrundvelli. KPMG var fengið til þess að leggja mat á kostnaðaráætlun um rekstur sundlaugar í Reykjahlíð miðað við sviðsmynd 1 um ódýrsta kostinn. KPMG lagði jafnframt til næmigreiningu til 30 ára þar sem hægt er að vegna og meta reksturinn út frá mismunandi forsendum. Miðað við grunn rekstrarforsendur eins og starfsmannahald, lántöku, viðhald o.fl. og að meðaltali 15 þúsund manna gestafjölda að meðaltali ári í 30 ár þar sem aðgangsmiðinn kostar 1.000 kr. er uppsafnað rekstrartap um 965 m.kr. eða að meðaltali 32 m.kr. á ári.

#### Vatnsgæði:

Nefndin óskaði eftir skýrslu frá Geochemy um samanburð á vatnsgæði á hitaveituvatni Skútustaðahrepps og Grjótagjárdvatninu fyrir sundlaug í Reykjahlíð. Niðurstaðan var að mæla með hitaveituvatni Skútustaðahrepps í fyrirhugaða sundlaug Reykjahlíðar vegna lægra efnainnihalds og minni útfellingahættu.

#### Hreinsibúnaður:

Mikil þróun hefur átt sér stað þegar kemur að hreinsibúnaði sundlauga hin síðari ár sem uppfylla kröfur reglugerða heilbrigðiseftirlitsins. Þann 6. apríl var vígður nýr hreinsibúnaður í Lágafellslaug í Mosfellsbæ. Búnaðurinn framleiðir klór úr matarsalti þar sem rafstraumur er notaður til að kljúfa saltið í frumefni sín. Þegar þau efni blandast vatninu myndast efni sem hentar vel til sótthreinsunar í sundlaugum. Fyrir sundlaugargesti þýðir þetta að klórlyktin minnkar talsvert. Sviði í augum og húðerting minnkar og efnin fara betur með sundfatnað. Tæknibúnaðurinn mun leysa núverandi klór af hólmi og hafa í för með sér bætt lífsgæði sundlaugargesta og starfsfólk og verða betra fyrir m.a. augu, húð og öndunarfæri. Þetta er einnig mun umhverfisvænni lausn.

#### Hagkvæmasti kosturinn:

Sundlaugarnefndin samþykkir að leggja fyrir sveitarstjórn að taka afstöðu til byggingar á sundlaug sem tekur mið af sviðsmynd 1 um ódýrasta kost til að reisa sundlaug þar sem gamla sundlaugarkarið var, m.a. vegna samlegðaráhrifa með rekstri íþróttamiðstöðvar. Fyrir liggja útreikningar og grunnforsendur hönnunargagna þar sem kostnaður við að byggja upp hefðbundna laug með steypu sundlaugarkari, hreinsibúnaði, heitum pottum, vaðlaug og frágangi á útisvæði liggur á bilinu 160-200 m.kr. Ljóst er að framkvæmdin og rekstur sundlaugarinnar verður fjárhagslega íþyngjandi fyrir sveitarfélagið en á móti vega lýðheilsuleg sjónarmið og búsetugæði. Í skýrslunni lögðu fram tveir nefndarmenn bókanir sem lesa má á í fundargerð sveitarfélagsins.

### *Afgreiðsla sveitarstjórnar:*

Sveitarstjórn þakkar sundlaugarnefndinni fyrir vel unnin störf og faglega skýrslu.

### Bókun vegna sundlaugarskýrslu frá H-lista:

Að mati meirihluta sveitarstjórnar þarf að nálgast þarf þetta risastóra verkefni á ábyrgan hátt. Í samræmi við stefnu H-listans og fjárhagsáætlun hefur frá árinu 2018 markvisst verið unnið að því að taka saman og greina kostnað við endurbyggingu og rekstur sundlaugar í Reykjahlíð. Slíkt hefur reyndar verið gert um árabíl, en nú hefur verið farið ofan í allar þær forsendur sem fyrir liggja samhliða ítarlegri öflun nýrra gagna og því hægt að taka vel ígrundaða ákvörðun með hagsmuni allra íbúa sveitarfélagsins að leiðarljósi. Forsendurnar hvað varðar byggingarkostnað eru nokkuð skýrar, en veruleg óvissa er um gestafjölda og greiðsluvilja sem leiðir af sér verulega óvissu um rekstrarhæfi. Að teknu tilliti til fyrirliggjandi gagna og stöðu sveitarfélagsins er óhugsandi að sveitarfélagið ráðist í uppbyggingu sundlaugar á þessum tímamarki. Slík fjárfesting sem ber með sér gríðarlega áhættu hvað varðar rekstrarhæfi hefði að öllum líkindum mjög neikvæð áhrif á rekstur sveitarfélagsins, nauðsynlegar viðhaldsframkvæmdir og aðrar aðkallandi fjárfestingar. Það mat staðfestir ítarleg fjárstreymisgreining sem rýnd hefur verið af sérfræðingum KPMG. Greiningin ber með sér að um er að ræða áhættufjárfestingu sem er óverjandi fyrir kjörna fulltrúa að standa fyrir að svo stöddu. Vissulega hefði sundlaug jákvæð áhrif á hamingju íbúa og lífsgæði, en fyrir þá fjármuni sem fyrirsjáanlegt er að færu í uppbyggingu og rekstur slíkrar einingar er hægt að ráðast í verkefni sem hefðu mun meiri jákvæð áhrif til lengri tíma litið. Vera kann, að einhverjum árum liðnum, að sveitarfélagið hefði bolmagn til að ráðast í þessa framkvæmd, en sá tími er því miður ekki núna.

*Helgi Héðinsson, Elísabet Sigurðardóttir, Sigurður Böðvarsson og Dagbjört Bjarnadóttir.*

### Bókun frá N-lista vegna sundlaugarskýrslu:

Undirritaður lýsir yfir vonbrigðum með rekstrarlíkan og forsendur KPMG vegna reksturs sundlaugar í sviðsmynd 1. Forsendurnar eru að mínu mati rangar og gefa þar af leiðandi ekki rétta mynd af rekstri sundlaugarinnar. Þá er ekki tekið nægt tillit til aukinna lífsgæða og hamingju íbúa auk betri búsetuskilyrða.

*Halldór Þ. Sigurðsson*

Lokaskýrsla nefndarinnar og öll fylgigögn verða aðgengileg á heimasíðu sveitarfélagsins.

### **Breytingar á kennsluháttum Reykjahlíðarskóla**

Hjördís Albertsdóttir kennari við Reykjahlíðarskóla mætti á fund skólanefndar og kynnti breytingar á skólasterfi á næsta skólaári en þá verður unnið markvisst að samþættingu á námsgreinum í öllum námshópum. Hjördís mun leiða breytingarnar og verður verkefnisstjóri.

Nefndin þakkar Hjördís fyrir góða kynningu og lýsir yfir mikilli ánægju með innleiðingu á samþættingu námsgreina í Reykjahlíðarskóla. Er þetta stórt framfaraskref í skólasterfinu og ánægjulegt að sjá kennsluhætti skólans þróast með þessu hætti. Nefndin vill jafnframt fá reglulega skýrslu inn á fundi sína um hvernig innleiðingin gengur.

### **Umsókn Skútustaðahrepps um Barnvænt samfélag samþykkt**

Skólanefndnefnd samþykkti á síðasta fundi að sækja um innleiðingu á Skútustaðahreppi sem Barnvænt sveitarfélag sem er verkfærakista og líkan sem styður við innleiðingu Barnasáttmála Sameinuðu þjóðanna inn í stjórnsýslu og starfsemi sveitarfélaga.

Innleiðingarferlið tekur tvö ár og skiptist í 8 skref, sem sveitarfélag stígur með það að markmiði að virða og uppfylla réttindi barna. Að tveimur árum liðnum, getur sveitarfélag sótt um viðurkenningu frá UNICEF á Íslandi. Viðurkenningin er háð því að starfsfólk UNICEF meti sem svo að innleiðingarferlið hafi verið réttindum barna í sveitarfélaginu til framdráttar og að aðgerðaáætlun

verkefnisins hafi verið fylgt eftir. Til að viðhalda viðurkenningunni þarf sveitarfélag að halda innleiðingunni áfram, setja sér ný markmið og óska eftir nýju mati að tveimur árum liðnum.

Formaður tilkynnti að umsókn sveitarfélagsins um verkefnið hefur verið samþykkt og hefst undirbúningur að innleiðingu barnasáttmálans í haust. Nefndin lýsir yfir ánægju sinni með að umsóknin sveitarfélagsins hafi verið samþykkt.



**HRÓS DAGSINS...** fær Vinnuskólinn undir stjórn Stefáns Jakobssonar sem fer virkilega vel af stað.

### **Kærar þakkir fyrir mig**

Þar sem þetta er síðasti sveitarstjórastíllinn minn vil ég nota tækifærið og þakka Mývetningum fyrir frábært samstarf undanfarin fjögur ár. Þetta hefur verið yndislegur tími fyrir mig og fjölskylduna, hér höfum við eignast vini fyrir lífstíð og Mývatnssveit á sérstakan stað í hjarta mínu. Samstarfsfólk mitt og sveitarstjórn kvaddi mig í gær og vil ég nota tækifærið og þakka þessu frábæra fólki fyrir einstakt samstarf. Mannauður Skútustaðahrepps er mikill.

*Bestu kveðjur*

***Þorsteinn Gunnarsson, fráfarandi sveitarstjóri***

